


Marc Dumas

Vihado d'amountagnage



C.I.E.L. d'Oc

Centre International de l'Écrit en Langue d'Oc
3 Place Joffre, 13130 Berre L'Etang
<http://www.lpl.univ-aix.fr/ciel/>

VIHADO D'AMOUNTAGNAGE

A vous-autre e à tu...
qu'esperas tant à jour fali:
d'uno aubo lindo...

VIHADO D'AMOUNTAGNAGE

A la vóuto de l'aubo!

Li deliranço de la sabo
sounaran li redoulènci dis embruni...

L'alo tranchudo de l'iroundo
avié trepassa lis aigo antico,
la rengueirado di rouguesoun testardo
de la fournigo escala l'acacia febrous,
dins lou prat endrudi, rebala la serp en deforo de sa prudènci.

Alor li menoun atubant
lou trepé di bèsti sus la tepo novo,
faran escouta d'ouro li luenchour d'aveni
respondre i redoun.di souveni d'espàci...

A la vóuto de l'aubo!

Dins li carriero escricho
d'un flume amountagnant,
l'ase s'enanara vesti de memòri
aqueло pouocco au sacre dóu printèms.

A la vóuto de l'aubo!

Passa la Pasco d'erbo grèvo
lis escabot mountaran
devers la resurreicioun di cimo.

PASTOURALO DE LA LAVANDO

I'a tant de terro pauro
coume de camin d'ase,
i'a tant de terro auto
que lou cèu soul a respeta,
i'a tant de terro inmènso
que la souleso apasturè de paureta.

I counfin di neblun
dis oundado de nosto mar terenco,
sus li pounchoun de l'aubre rèi
assegura de soun eternita:
uno abiho que vihavo
acoumpagnè lou darrier ome
devers uno d'aquéli simplò
i flamo d'ourizount.

Flour dis auro e di pèiro
s'óupilant de reviéuda
li fiò di travès acampassi,
la lavando sóuvajo e feroujo,
esflourejado pèr lou cascai ideau
d'aquesto vestalo,
pres-fachiero de ciro de lus,
fuguè averado.

Perfum amar d'etèr celèste,
acourdanço de terro prefoundo
gràndi planuro desoubrado,
esperit flourau d'ounte gisclara
un titoulet d'aigo
e uno meloudò d'essènci
pèr encigala lis umble
dins aquéli vàsti souleso de rèi.

PER UN PAÏS

Anarai samena mi draiòu
daut li pounchoun feroun.

Anarai béure i clarta
di sèr de pensié rout.

Anarai crida i sourd l
a paraulo di tèms.

Anarai vers lis ouratòri vuege
prega emé lou vènt.

Anarai vers li capello
qu'espèron sènso plagno
uno cansoun d'enfant.

Anarai dins li glèiso
que l'óublit a counsacra
de tout rebat de verita.

Anarai querre li semenço prefoundo
pèr de lòngui rego d'umanita.

Anarai bacela i counfin dis estrambord trufa.

Anarai courre sus li plano li camin mespresa.

Anarai ploura sus li plaço tóuti li font legido.

Anarai rire di plueio qu'acampon mi bouquet.

Anarai pèr li camin que picon à ma porto...

Anarai de vuei e subran coume aièr e deman...

Anarai au rescontre
culi sènso fidèu,
sènso coumpan e sènso apoustoli,
devers li terro sènso fin
mounte l'utoupìo flouris...
Pèr un païs qu'es lou vostre.
Pèr un païs qu'es lou nostre.
Pèr un païs qu'es lou miéu.

LUBEROUN

Maje cors tremountant
que cavo la moufo di coumbello
pèr li fau de recourdanço.

Alenado sóuvajasso,
puissanço e dis auro e di mar
enfouigado souto l'aus di tèms.

Quant de draiolo furtivo
pèr d'aubo granado,
mounte lou reinard cour bourrido
e escound sa predo souto li redoulènci di sounge.

Piado endourmido
di diéu deubre-vivènço,
que lou senglié di prous
butasso li resson.

Luberoun, vaste bastimen de Pan,
encala d'un caboutage sènsoun confin.

Castelaras ferra à tout pèd,
i demandaire miserable
o parlufié,
que l'obro souleto de l'iéli rouge
enracino dins soun patimen.

Proutiéu inagoutable
de la creniero sourdo d'éuse
que la lumiero manjo e abaris d'afiscacioun,
gaiardas draiou aurouge de segureta
que porjo i pas rebela
la maternalo enebriaduro di crestén.

LOU FRU DE LA TERRO

Escouto dins lou fru de la terro
la litanìo di druds oumbrun,
canton li limbo dóu tèms,
e traspauson li séuvo vasto
en de fugido infinido,
ounte anaran mouri lis estello.

Chimo, peiralin vers l'encèns di baragno 1
i pouèmo rebouli d'aigo neisado,
un pau coume un vin foui
qu'un rasin trop abasani au soulèu
vestis jamai dins sa raubo.

Aluco, mai liuen que l'ourizount
dis armo, di crid, di poudé e di glòri,
l'invincible triounfle dóu jardinié,
umble emé soun gèst de fe,
que sauno dins la rego dóu lendeman.

Alor, pougnaduro durasso
d'un courage acarnassi,
duerb la trai di simple
qu'an chausi la car di fru de la terro
coume tabernacle de moumenet.

ENGÈNI DIS AIGO

E Diéu boufè lou sang de la terro
e l'aigo raiè dóu fiò tenebrous,

e Diéu boufè lou sang de la terro
e l'aigo empliguè la rounso dóu bos,

e l'Aigo plourinejè sus li roucas
de neissènço,

e l'Aigo agouloupè li pèis de la vido,

e l'Aigo trepanè li cors palot
e lis alo lindo,

e l'Aigo revassejè devers lis isclos
dóu printèms,

e l'Aigo apasturè li calignaire
en Paradis.

E Diéu boufè lou sang de la terro,
pièi faguè pauso:
à la perfin aluquè sis esperanço
que s'enanavon vers la mar.

ESTIÉU

Ai regarda long-tèms
lou galejoun s'enaura sus l'èr fla...
Sóufinant pèr deman
l'eissu de la sauseto,
pourgènt à jour fali
soun tros despatria
vers d'ouro de tempèsto.

A despart d'eu grihet
que sègo à niue l'antifo,
l'errour de l'aigo folo
recato soutu la caud
l'ausant de tout parla.
E lou miejour de soun uscla
escracho, espadis, escupis
tout goust d'infèr barbare.

E, en ribo d'un Styx enrabia
de secaresso avuglo:
Arribaras de tard
Tu, angeloun di sorgo
que campejes lis aigo,
enfioucant de ta set l
i frechaio trop mouisso
di niue despoutentado.

Se carnejon de fiò
lis auturo e li baisso
sènso uno sousto d'ouro.

Ai regarda long-tèms
lou galejoun s'enaura sus l'èr fla...

CELEBRACIOUN DE L'ÓULIVIÉ

Un dramo
en foro di pountannado,
s'aflouro dins toun cors d'aram.
Pege de voues taravelado
d'ounte s'ausis lou resson
devers li camin de Nouè.

Tu, aubre dis elegi,
dins tout lou revoulun di diéu
que la mare nostrum
ensertis coume un sant retrra,
semounde en sacrifice
ta lus is annado d'encèns.

Fru d'un mistèri amar
que raubo i frejour di terro
la cremaduro de la mar,
rescoundes mau dins toun calineja d'oumbro
toun remoulige de soulèu.

Li sants òli que naisson
dins ti veno
soustiron enjusqu'i frechaio
dis Infèr e dou Paradis
li vertu de tutto meno d'obro,
envergougnon, e lou mau e lou bèn
e dis amo e di cors.

E d'Arle à Cordo,
de Cartage à Palermo,
as basti toun empèri sus li lagremo de Jerusalèn.

E Roumo escafo Ateno
e estremo lis èime,
i counfin dóu sabé
e d'un tirani poudé
d'un Diéu soulet e triounflant.

E tu que veguères mourir
Ramsés e Cleoupatro,
Ulisse e Cassandro,
Abram, Dàvi e Jousué,
Cesar, Jèsus e Mahoumet, a
ubre rèi. fiéu de Getsemani,
ges d'espèci dóu mounde
noun espremis, noun canto,
e noun trasfiguro encaro
em' un gèst requist
qu'acò 's bèn de crèisse
e d'espandi
aquel image inmourtau
nascu d'un esfrai d'arquèmi
que raio uno lumiero vivo,
mesclant un soulet cant de pas,
de mistèri e de fe.

Pièi, quouro s'acampara
la fin di tèms alabre,
unen varage d'uno arco
dis enfustage sacra,
l'aubre à l'óulivié,
e l'óulivié à l'ome,
sara la perdurable alianço
que sagelara enfin
e lou verbe di tèms
e la pensado di mort.

À MA LENGO

Dóu tems que s'enaurè
la gau di fiò ardènt
sus lou roucas de la pieta,
l'hosanna s'amoussè
i lume de si mort.
Pople d'o courrès vèire enca 'n cop
la vesioun eliptico
qu'atubo au trelus
lou darrié calabrun.

Liuen, mai liuen encaro que la mar de l'istòri,
arrivè la musico di siècle
coume un resson de glòri.

Escoutas lou Raimbaut qu'estrassè de soun noum
li cant qu'auson encaro li femo en paradis.

Alucas lou Touscan dins soun vèsti de flour
chima à nosto lengo un perfum dis infèr.

Bevès dóu Maianen l'aigo que vèn gausi
lis isclo calendalo dins soun relarg de purgatòri.

Guinhèn, Sèrgi, Pèire e vous autre,
Bóumian d'uno escrituro que plouro,
coume un brama de pastre que s'envai,
enfin dereviha,
regadas la grando escourtado
dis obro alanguido,
di pouèto alassa, que despièi quouro espèron passa sus l'autro ribo?

Ié diguère mounte anas
ome dóu païs nostre ?

Partèn, me respondè
lou plus aut, lou plus clar...
Partèn, eiçamoundaut, vers un soulèu levant
mescla d'un siau pounènt
alesti un castèu
d'un rai d'estello morto
de mounte pourren vèire
la vesioun eliptico
d'un darrié calabrun
que noun vòu s'amoussa...

AMOUR O LIBERTA

L'amour desparia a fugi la niue,
cercant lou mountamen vers li sorgo
coume l'aucèu que, s'enaurant,
volo vers l'estregnemen dóu cèu,
s'encigala d'espaci.

Quau saupra assadoula li passioun
i font claro de la tendresso ?

L'amour desparia a fugi la niue,
destapa di fatàli segureta.
Trelus auben en bousco de car,
de frago roujo que saunon d'espèr,
la fringalo, lou ruscle,
baraton emé l'amista.

Quau saupra assadoula li passioun
i font claro de la tendresso ?

L'amour desparia a fugi la niue.
Atalage temp i melico d'estieu
tirassant la cremado de sis iue,
liuen, la séuvo drudo de l'esperit,
mounte lou mistèri di cor
arresouno l'amo.

Quau saupra i font claro
de la tendresso
abéura i frescour d'amour
l'aigo de la liberta ?

LA SAU

Voudriés trouba la sau
que nourris lou sabé,
coume l'aubre que cavo
pèr crèisse en couneissènço
dins l'èime de soun fru.

Voudriés escrincela dins lou cèu
asseda d'un grand ressaut d'espàci
coume l'iroundo qu'estrasso,
d'un vòu foui, touto joio sereno.

Voudriés canta, emé l'aigo de mar,
lou revoulun que s'envai dre,
e que deman tournara mai
emé si pèis escoundu dins si velo.

Voudriés crida is ome
que touto gau de viéure
se pago au presènt,
que li sòu de la sau
soun fa de dignita.

* * *

L'AIGO-PENDÈNT CAVA

Nèu fréulo de l'enfanço,
entre-signe de riéu deliéura,
parti au rescontro dis aigo mesclado
devers li valèio sènso age

Cant profound dóu gaudre
que crèbo d'ufanouso autitudo
e respelis i sourgènt dóu regard
di matin de pan caud e di proumesso
se recaufant de cade sèr de plenitudo.

Vesioun tutto recampado
sus li brèvi ribo d'un sourrire,
enaurado de l'esprovo di plour:
lòngui journado de man pàsi,
d'oundado d'angouisso
e d'alegresso d'obro.

Legi, aièr dins tis iue sauvadou,
aquelo aigo nevadisso dis annado
qu'espremis à l'aigo-pendènt cava
l'inmènse lié di passioun secrèto
e que l'areno a assoula
pèr ié rescondre tóuti li rebat
ennega di frescour partejado.

* * *

L'AUCÈU BANDIERO

Eres nascu au miejour
d'un soulstice embuga,
sesido salabrouso
d'un roucas reguignant
e de l'èr abrivaire d'un cant de paureta.

A l'aucèu mal-astra
li grand camin dóu cèu
s'embarron d'estrechour.

Si chancello desliechon
l'espàci desnisa
de tout soun douna d'ande.
Despietadous varage,
devers li mar cousmico
qu'estrasson de clarta
l'agrasamen dis auro.

Tu, voulaves d'amour
aguènt basti tis alo
dins lou mesclun di vènt
dóu mounde que lampavo.
Vouguères que trop lèu mestreja l
is ourizount que s'esbignavon.

E li jour creissènt
i'aloungaves toun regard.
Viviés cubert d'uiau,
manjaves de nevado,
regoulant lou vierjun dis astre amoussa.

Mai la chamado usclado,
que subroundè toun feroun derrabage,
aubourè dins li nèblo
l'arc-de-sedo enebi

qu'es belèu la bandiero
qu'uno vido acabado
tremudo d'uno danso de mort
en un vòu musicaire
e de lindo bèuta.

ESPERIT DE LUS

Te veguèron jamai t'espaça
emé l'escumo esluciado
d'uno estello envejouso.
Tu! Esperit de lus!
escapa di man de Proumetiéu.

Eres un pastre avugle,
trevant emé soun avé
dins li limbo dóu tèms
en bousco de repaus.

Alassa de coumpta de tastoun,
de sentido,
tis agnèu negre o blanc:
astrado incrediblo
que noun deviés jamai te rancura

Uno niue mai espesso,
ilimitado de mesprés,
te boutères à canta...
Lou clarun de ta voues
derevhè lis ange.
E que la lus siegue...
E la clarta fuguè!
Dóu trelus s'abrandè
la proumiero aubo d'uno estello
que ié dounèron toun noum.

SESOUN PARTEJADO

S'endevèn de printèms de vido
qu'aurien vougu naisse
sus li plour d'uno eigagno de niue.
Se capito de vido de printèms
que charron longo mai
i lindau de nòsti jo.

S'endevèn d'estiéu de jouinesso
qu'atubon li fiò cardinau.
Se capito de jouinesso d'estiéu
qu'abandon enjusqu'i touemple
lus e frescour de nòstis iue.

S'endevèn d'autoun de pensado
que s'abarisson de fru sóuvage.
Se capito de pensado d'autouno
que barrulon...
sènsø espèro de meisoun di tèms.

S'endevèn d'ivèr d'egouïsme
que nous sèmblon jamai s'acaba.
Se capito de silènci d'ivèr
que retènon souto la nèu bluio
de gau de jouini riéu.

Enfin vènon... lis aigo inmènso
dóu partage e dis àuti mar!
E plus ges de part de sesoun.
La ressaco enmeno e tourno mai
d'un à l'espèro de l'autre.
Pièi l'autre encaro deman,
pèr l'un, devers un definitiú destenèmbre de se.

VIEIOUNGE

Pourgi pèr un printèms que noun s'acabo,
lou camin vesita dóu vieioungue
s'assabento d'aquéu roure óublida,
que li blessaduro dóu tèms
an espeia coume mort-peleto.

Dous vièi assajor. d'acoussegui
un espaçamen de-bado
sus la musico de si pas.
Caminado sereno devers la calamo,
mounte sis oumbro carrejado,
entremesclon passat, presènt e aveni
devers l'eternau cicli
que noun li tarabusto,
que noun lis espèro,
que noun lis ajoun.

Istant plen e fugitiéu
d'eternita poutènto o miserabilo...
Es belèu la gràci que passo?
Es vertadieramen ço qu'espanto Diéu...

* * *

VESIOUN DI NOUVÈU MÈSTRE

Dóu mounde de deman
s'engarbo lou sanclame.

Quau aujara escriéure l'astrado
de la roumpeduro emé la maire ?

Derraba au lourdige di jour,
escafant l'assoulun di païs cura de paisan
mestrejaran lou nourrimen de l'espàci estelen.

E s 'alargaran pièi sus l'escumo
di mar cativo
pèr i'adurre li flume di banlego.

Amoulounado espetaclouso
de ciéuta de triounfle teini,
mesclado dins l'aigo-sau de culturo
d'uno souleto lengo
en parangoun anglés o bèn american.

Astrounoumio de sabentas
que faran naisse de boucau
lis enfant sèns amour
arrenda à Vènus avalido.

Au museon terrenau, i'a 'gu un arc-de-sedo
que, calignant d'asard la flour de resistènci,
escoundeguè dins un tiradou d'esperanço
uno abiho testardo emé sa lagremo de mèu.

FEMO DEMAN

Afourti au clarun de l'ome entravessa,
femo, quau l'a di?
Saras lou nouvèu poudé dis annado à veni.

Divesso descasegado, enjusqu'aro,
di masclas mestrejant,
sarás l'empèri...
Saras la respelido d'uno nouvello Gaia.

Mestrejant à toun tour,
mestrejant à toun biais,
faras plega li gouvèr li plus aut,
sarás pièi capitàni, e tambèn generau.

Grand mege dis esglàri febrous,
sarás l'astrado que menara lou mounde
devers de terro noun vesitado.
Estamparas à l'ome desmama d'errour,
toun nourrimen enjarbi de drùdis esperanço.

Femo, aganto l'empento universalo,
sarás lou gran nouvèu à semena,
que, tu, souleto, counèisses lou soulas
de faire un enfant pèr n'en basti un ome.

Avans que de parti, glouriouso,
vers quant d'aveni redemtour,
alongo aqui ta car divino,
baio-nous uno chato, e tambèn un droulas,
vuejant tout toun sabé,
mescla de sagesso e de sang.

CANSOUN CATIVO

Aviés amadura l'acourdanço
d'uno chourmaio barbaresco,
oste d'un abelan silènci,
lagremo d'aucèu mesclado
i cascavèu d'un vièi riéu.

Mai es belèu encaro i femo
que devèn de te trouba douço ?...

Alor se soun basti li musico,
lengo au mitan di lengo,
allelua mai qu'universau.

Inne escoundu que s'aubouro
i clarun de la liberta,
cant d'uno souleto voues de milo mounge
o de dous calignaire au fiermamen nega.

Lengo au mitan di lengo,
embarcadou di pople en camin,
ères lou liame di joio e di doulour.

Quau sias vous autre, dins lou bescant,
que d'ouro en ouro se desgargamello
pèr acaba lou cant malaut di nacioun
estacado à si marchand rapinous abramant ?

Es-ti la tourtouro fréulo que ié fai pou?
Se, de cop que i'a, se capitavo
de deliéura dins un soude ressaut
d'arpejado auturouso
tóuti aquéli cansoun cativo.

Lengo au mitan di lengo,
Cant di pople, noun fau plus te teisa.

PAÏS FEMO

S'es dins lis iue d'uno femo
qu'as legi toun astrado d'enfant,
alor mesclo ta vesioun d'ome
à-n-aquéu tros de car...
Creissira!

S'es dins lis iue d'uno femo
qu'as vist s'esclargi la niue,
alor aganto lou draiou dis ouro...
Seguira!

S'es dins lis iue d'uno femo
qu'as ama li jour atravali,
alor estaco l'obro dóu lendeman...
S'acabara!

S'es dins lis iue d'uno femo
qu'as recouneissu la part d'un païs,
alor encamino-te sènso biasso...
Viéura!

L'ENCLAUS DI SCIÈNCI DÓU VÈNT

Estrasso desmamado d'un luenchen parla divin,
dóu vènt nus, l'ome se vestis dre:
Raubant sis enebriaduro d'autro part...
e sis astrado d'eiçalin...

Leissant is aubre que mendicavon
soun despatriamen
tóuti si desiranço de finfo
pèr li terro d'eisode infinito.

Loumbardo de gres alemand,
Mistrau de piboulo bastardo,
Vènt Negre di boufo- lume,
Marinado de sau grèco,
Narbounés mandadis d'ereti,
Levantas d'erbo trissado de Judiéu,
Eissero de garanço armènio,
Garbin cantant emé li caraco,
Siroc mescla dou safran d'Aràbi.

Cisampo, cisampo à pièi mai sènso noum
que lampo sus la nèu d'un matin clar.

Coume aièr l'aigo libro e sóuvajo,
te volon embarra: vènt de raço d'asard
dins l'enclaus teini di sciènci,
mounte s'abouco la legèndo.

Deliéuras, o sabentas!
li cadeno d'aquéli diéu
e que courron vènt arrié
devers li plano d'amarun
e li mar pantaiairo.

Vènt, tiro toun camin de coulour
dins l'óublit blanc
e pinto li cresten di pibo alargado
d'uno pureta de cèu nouvèu.

TERRO IVERNALO

L'argelo t'a pasta ‘mé dos poussو de glòri:
l'uno pèr basti toun cor d'un amour meireja,
l'autro pèr recata ta croio de memòri.
La terro dounè de pan, la pèiro soun parla,
flourissènt l'escrituro
qu'es lou liame dóu capelet di creaturo.

E quouro auras treva touto ribo de terro
coume lou cavalié pauso soun quiéu gausi,
vesènt l'umelita di darriéri passiero
que noste pensamen a tout lesé d'ausi,
destaco toun chivau las
e d'à pèd vai-t'en trouva l'ivèr de toun soulas.

S'aviés pouscu tira de ta tèsto cargado
de paraulo clafido d'estrambord ameisa,
auriés fa mountjoio lou tèms d'uno abrivado
emé tóuti li printèms qu'aviés amoulouna.

Mai l'ivèr es toun rode e te ié fau pausa,
'mé tout l'èime que podes.

Alor, la pèiro eissucho o bagnado d'amour
sara ta maire e toun amigo pèr toujour.
Noun reguignes i pas que te porge la Vièio,
endraio lou pourtau desfrouca de si velo,
la mort es joio d'un pres-fa
que la pèiro e la terro acaben de paga.

LOU GRAND PERDOUN DIS AMELIÉ

Tu, vièi farandoulaire, en terro dóu miejour,
emboutaves trop lèu la danso de la primo.
Ta tèsto desfuiado, vengudo d'Asio en flour,
princejavo toun simbèu
d'uno part divinalo qu'avié chausi toun fru
coume grano de l'èstre.

E se poudié canta dins lou païs sestian:
L'amelié es en flour, femo duerbe toun boumbet
e reçaup la sesoun, e qu'embaumon ti sen.

Eneigaves toun pege espeia,
negre e agroumeli coume uno souco morto
e subran respeli d'uno nevado blanco,
meravihouso inferto raubado i nivoulun de fre,

anant culi i novi despaciènt
li lendeman de cigalo innoucènto.

Tu, desenant, siau, encantaves l'alandado
d'uno fugo de sabo, jouant emé l'ivèr
siegue à papo o flour
o coume un bram “felepino” d'amelo bessouno.
E li diéu trop jalous castigavon
aquel ourguei de prince
tant de cop restoubla en terro de Prouvènço.

Mai qu'espera enfin d'uno talo legèndo
emé vous, Acamas e Filis, quau lou saupra jamai?
Regardo ço que rèsto de tout ço que fuguè:
de l'aubre anounciaire de t6uti li fru de l'an,
just un castigamen d'abandoun e de pòu.

I pourtau di village , noun auj on s 'enouncia ,
ribejant li cementèri nus, à l'oumbro di ciprès
qu'an remuda ti bèn-ananço
coumpañ di vièii capello arrouinado
is orle di camin, vers li plan trescampa.

Vivon coume prouscrit dins soun siècle bandi.
Alor, tau penitènt negre, pourtant cagoulo fiero,
li darrié arresounon lis ourizount de fre.
E, en plaço de farandouleja
i lindau di glèiso que soun fru segnourejo,
nous faudra bèn prega:

Perdoun i terro pauro
que rèston en crous tancado,
perdoun i terro auto,
ensarrión si saume.
Perdoun i terro drudo
de si mesprés pivela pèr soun anamen de misèri.

Perdoun is ameloun, i dragèio en plour,
perdoun à-n-un perlet d'amelo amaro,
perdoun douço princesso, sultano desvelado,
perdoun amigo amelo de la subre- vivènço,
d'un tros creba de nòstis us de vido.

Perdoun is amelié de la bello Coumtesso
qu'embuguèron d'òli miracle
la car de la e de clarta
dis ufanóusi chato d'Arle.
Perdoun i taulo pauro au cacho-fiò de l'an
e peréu i festin qu'abrandavon li grand,
perdoun enfin is amelié de touto la Prouvènço.

Venès penitènt negre,
venès en roumavage
proununcia li paraulo roumano
qu'an tant fa floureja ta lengo
e escupi li catau de l'uba.

Beni sié, escudié de touto primadello
juja au capitau de touto repentènci,
just just cascaies encaro i soulitàri sage,
li darrié mot d'6u Grand Perdoun de toun terrage.

Que la longo plagnitudo sourdo,
en s'enaurant à brand,
siegue enca 'n cop l'entre-signé
d'un printèms avouda d'imen
que semound is amelo di damo
lou flouriau di jo e di fiò de toun vierjun sacra.

LA DICHO DE LA PÈIRO MUTO

Fam nouvialo de la matèri,
gran semena de lus
de mounte greiara
en deforo di tèms councebu
touto neissènço de la pèiro.

E li cant espoumpi
sus l'èr de l'ouro mineralo
'mé la paciènci noun tempouralo
bastiran li nivoulado
di roucassoun cousmi.

E lis oundo fragilo
di roco cristalino
cafido de vido ferouso
e deliéurado de cèu marin
abariran,
fru de l'aigo-marino,
lou pan de sau en fiò
dins lis orto de la serpentino:
un cementèri de vivènt.

E li pèiro espelissien
meloudio impietadouso
e secrèto,
foulastro revoulunado
desmamado de noun-rèn.

E li pèiro vivien
encadenado i presoun de Plutoun
pastejant sis arc-de-sedo d'orfèbre
desempièi de milanto e milanto d'an.

E li pèiro assetavon
sis archipèlo de memòri.

*Regardo aquelo chatouno
que s'envai...
pèr lou camin peirous e
m' un pousset d'estello
estregnènt dins sa man
un tros de fèsto universalo:
Es un clapas uman.*

Estubado alassado
de siècle de lucho terrassenco
mounte l'ogre minerau
devouravo l'aubre emé lou pèis
L'ourdounaire se derevhavo

subran
un santoun à la man.
Tout lèst de parteja
un bregoun de sabé
emé l'argelo mouisso
sorre de car requisto
de la pèiro en camin.

Pastant aquéu relarg
mescla d'amour, de pantai,
de soufrènço e d'espèr.
Alor faguè lou paire de l'enfant:
Estre liuenchen
derraba de sa maire, la pèiro.

Bouscavo sènsa relàmbi,
l'armo, l'eisino e la sousto
devers lou sen maternau.

Eici descurbiguè lou fiò
emé la frechaio dóu peirard.
Eiçalin, mounte lou coudoulet barrulavo,
ié veguè la pèiro móuniero
pèr ié trissa soun blad d'ivèr
o ié basti la rodo de soun càrri.

Tu, Baumo di Peirard, couneissiés lis ancoues
espremi sus la lauso emé l'ocre dóu simulacre.
Proumier entresigne d'uno epoupèio
de bastissèire e de sabentas.

*E la chatouneto
emé sis iue d'esmeraudo
que jogavo emé lou clapas,
creissiguè, s'endevenguè uno femo.*

Pèiro de mèstre coumpagnoun
e coumpañ de pèiro mestresso.
Enaurèron li tèmple de pensado
e li cros di tiran.
Coume la, clafido de soullicitudo,
que matrassè Gouliat...
e visquè triounflanto
dins lou cor de felen de Salamoun.

Piramido ufanouso d'elegi.
Catacouumbo óublidado di saume.
Catedralo di pople en esperanço.
Castèu di prous trevant.
Abadié drudo de soulitudo.
Bàrri de touto meno,
auboura davans lis aubo mau-seguro.

Servicialo recampado
i dicho dóu cisèu:
La pèiro flourissié l'escrituro,
cantavo l'alegresso,
pregavo en silènci,
impausavo sa lèi
dins lou treboulun de l'istori.

Pièi tout s'avaliguè
dins lou demoun dis age.
Dóu resson di roucas
à la pèiro levado que charrè sus sa routo,
lou vièi ome gausi
coume uno pèiro de bugado
noun ausissié plus la voues
de soun trelus escalustrant
e óublidè lou clapas de l'enfant.

Alor la niue s'entournè mai
d'uno aurasso terrassenco,
grando sabentasso
de la matèri en camin
descuberto soutu la capo dóu cèu.
La clau de diamant clar
sarravo la pèiro filousoufalo,
misteriouso plenitudo
dis esglàri e di glori.
Lou clapas trelusènt èro aqui:
siau, sacra e lèst pèr la trascendènci,
venènt querre sa predo
pèr l'eternita mineralo.

l'Astrado

febrié de 1994

Estamparié Bené

Nimes

Tèste integrau

Còpi interdicho

Reserva pèr aquéli qu'an la licènci d'utilisacioun

C.I.E.L. d'Oc

Centre International de l'Écrit en Langue d'Oc

Sèti soucian:

3, plaço Joffre - 13130 Berro.

Tóuti dre reserva - Tous droits réservés - All right reserved.

© Centre International de l'Écrit en Langue d'Oc - 1998

© Adoubamen dóu tèste

de la meso en pajo:

e de la maqueto pèr Tricò Dupuy

en sa qualita de mèmbre dóu Counsèu d'Amenistracioun dóu CIEL d'Oc.

